

Dithero tsa Tirelano mo Kutlwanong

01/2015 Thero ka Sontaga wa 01 mo sebakeng sa Adfente, e le ka 30. 11. 2014

Mo leineng la Modimo o e leng Rara le Morwa le Mowa o o Boitshepo_

Lefoko le le okamelang beke eno le kwadilwe mo go Sagaria 9:9, le re: **AKgosi ya gago e e tla kwa go wena.**

1. Sefela sa 43 - 41/43
2. **Thapelo:** Modimo, Morena yo o rategang, re a kopa gore o re tsoseletse gore re fitlhelwe re ipaakantse go amogela Morwao ka boitumelo jo bogolo, fa a tla, re tle re go direle ka dipelo tse di tshakileng ka ene Morwao Jesu Keresete, Morena le Mopholosi wa rona. Amen.
3. Lefoko la Testamente e kgologolo le kwadilwe mo go Jeremia 23:5-8;
Epistolo ka fa thulaganyong ya 2 e kwadilwe mo go Baroma 13:8-14;
Efangele ka fa thulaganyong ya 5 e kwadilwe mo go Luka 1:67-79.
4. A go ipolelwe tumelo ya bokeresete!
5. Sefela sa 44 - 42/44
6. Thapelo ya mmadi wa thero.
7. **Efangele** ka fa thulaganyong ya 1 e kwadilwe mo go Matheo 21:1-9, e re: "E rile ba atamela Jerusalema, ba fitlha kwa Bethefage fa Thabeng ya Diolefa, foo Jesu a roma barutwa ba le babedi, a ba raya a re: 'Yaang kwa motsaneng o lo lebaganyeng nao; lo tla akofa lo fitlhela esele e golegilwe, e na le eselana; di gololeng, lo di tsise kwano go nna. Mme fa mongwe a bua sengwe le lona, lo re: 'Morena o a di batla;' mme o tla akofa a di romela.' Mme tsotlhe tse, di ne di dirafala gore go dirafale se se builweng ke moporofeti a re: 'Bolelelang Morwadia Sione lo re: 'Bona, Kgosi ya gago e tla go wena, e le bonolo, e palame esele, e bong eselana, ngwana wa esele.' Barutwa ba ya, ba dira fela ka fa Jesu a ba laetseng ka teng. Ba tsisa esele le eselana, ba baya dikobo tsa bone mo go tsona, mme Jesu a e palama. Foo bontsi jwa batho jwa ala dikobo tsa bone mo tseleng; mme ba bangwe ba kgaola dikala mo ditlhareng, ba di ala mo tseleng. Mme batho ba ba mo eteletseng pele le ba ba mo setseng morago ba tllhaba mokgosi ba re: 'Hosana go Morwa Dafita! Go bakwe yo o tlang ka leina la Morena; Hosana mo magodimodimong!'" Amen.
8. **Thero:** Barategi mo Moreneng wa rona Jesu Keresete, ka Sontaga wa kajeno o e leng ya ntlha mo sebakeng sa Adfente re simolola ngwaga o mošwa wa kereke. Ka ngwaga o o fetileng ga rerwa mafoko bogolo a diepistolo tse di tlhomamiseditsweng Disontaga ka fa thulaganyong ya borataro e e bonalang mo dikopelong tsa kereke ya rona. Mo ngwageng o mošwa o go tsewa gape diefangele tsa thulaganyo

ya ntlha e e lebaganyeng le Disontaga le meletlo ya ngwaga wa kereke. Ka kaelo ya gagwe Martin Luther o kaela mo therong ya ntlha ya lokwalo lwa gagwe lwa dithero tsa diefangele tsa ngwaga wa kereke gore bareri ba tlhokomele gore ba rere diefangele tsa Disontaga le meletlo yotlhe ka go tshwaya ka thanolo e kgolo gore diefangele di re senolela jang gore Jesu ke mang, Jesu o re diretseng ka go re baakanyetsang, le gore diefangele di re kaela gore re itshole jang, rona ba re leng bana ba Modimo. Luther o tsaya ka sekao sa efangele ya Sontaga wa kajeno e e bolelang gore Jesu o ne a tsena kwa Jerusalema gore go bonale sentle gore o rayang ka kaelo ya gagwe. O araba potso eo ka go re sedimosetsa le ka go gatelela

1. se Jesu e leng sona;
2. se Jesu a se re diretseng;
3. se Jesu a se lopang mo go rona.

1. Ka fa thutong ya efangele ya Sontaga wa ntlha mo sebakeng sa Adfente Jesu ke mang? Mo efangeleng ya kajeno re bona karabo e e gakgamatsang. Re a utlwa gore Jesu o roma barutwa ba gagwe kwa Bethefage gore ba batle esele le eselana ya yona tse di leng teng koo, a re: Ba di golole, ba di tsise mo go ene ka gore Morena o a di batla. Morena a reng? A ke mong wa tsona. Ee, ke ene. Ee, ke nnete Jesu ke Morena wa tsotlhe, le tsa tsotlhe tsa me le tsa gago. Tse re nang natso, nna le wena, re di laoletswa fela gore re di dirise gore re tshele ka tsona, gape re thuse ba bangwe ka tsona ka lorato lo Mopholosi o re ratileng ka lona, ka tse tsotlhe di tswa mo go ene, e bile ke tsa gagwe. Mo bofelong re tla bileliwa go ikarabela ka tse re dirileng ka tsona tse re di laoletsweng ke Morena yo e leng Mong wa tsotlhe. Sa bobedi se re bonang mo efangeleng ya kajeno ka se Jesu e leng sona ke boammaaruri jo boglolo jo re bo senoletsweng ka polelelo-pele ya Modimo e e kwadilweng ke moporofeti Sagaria se se diragaditsweng, fa Jesu a ne a tsena kwa Jerusalema a paleme esele. Polelelo-pele eo e re: ABolelelang Morwadia Sione lo re: >Bona Kgosi ya gago e tla go wena, e le bonolo, e palame esele, e bong eselana, ngwana wa esele.=@ Jesu wa Nasareta ke Kgosi ya Jerusalema; ke ene yo o gorogileng mo motseng wa Modimo gore a diragatse tiro ya go pholosa batho ba merafe yotlhe ba dipaka tsotlhe ka go ba swela mo sefapaanong, le ka go tsoga mo losong ka letsatsi la boraro. Ke ene yo o tla goromeletsa Mowa wa ona mo barutweng ba gagwe gore ba simolole kwa Jerusalema go rerela merafe yotlhe tlhabologo e e isang mo boitshwarelong jwa dibe mo leineng la gagwe.

2. Sa bobedi se re se utlwang ke se segolo tota, se re: Jesu o tla mo go rona. Efangele e re: Bona, Kgosi ya gago e tla go wena. O ne a goroga kwa Jerusalema, mme se se lebaganyeng le nna, le wena, le rona

rotlhe ke fa a tla mo go nna, mo go wena, mo go rotlhe. Go molemo go itse gore Jesu o ne a tsetswe ka Betlehema, a swela mo sefapaanog kwa Golegota, a tsoga mo baswing, a roma barutwa ba gagwe gore ba kolobetse mo leineng la Modimo o o Borarobongwe, le go ba bolelela gore ba ba hutsafalelang maleo a bone ba itshwarelwa maleo. Go molemo go itse tseo, mme se se batlegang bogolo mo go nna le mo go wena, mo go rona rotlhe ke go dumela, le go ikanya gore o tletse nna, le wena, a swela nna le wena, a baakanyetsa nna le wena botshelo ka tsogo ya gagwe, ka boitshwarelo jwa dibe, nna ke kolobediwe, wena o kolobediwe, nna ke itshwarelwe maleo a me, le wena o itshwarelwe maleo a gago, o tllile mo go rona go nna mo pelong ya me, o tllile mo go wena go nna mo pelong ya gago, rotlhe re lemoge gore o rata go re direla tseo ka bopelotlhomogi jo boglo. O bonolo, o na le kutlwelobotlhoko, pelonomi, le bopelotlhomogi. Ga a rate gore re latlhege, mme o rata go re nne le botshelo jo bo sa khutleng.

3. O rata gore re mo amogele, jaaka bontsi jo bogolo jole bo ne bo mo amogela kwa Jerusalema, ka go mo tumisa, ka go mo kopela gore a kgone go diragatsa tse a di gorogetseng kwa Jerusalema go di dira, re mo kopele gore a kgone go dira ka fa maikaelelong a gagwe mo go rotlhe ba re utlwang Lefoko la gagwe gore a re ntshe, a ntshe nna, a ntshe wena mo thateng ya loso, le mo thateng ya ga Satane, a re itshekise mo maleong a rona, a re bope tota gore ka tsotlhe tse re leng tsona, le tse re nang natso re ba gagwe, re dumele mo go ene, re mo ikanye, re mo direle, re mo leboqe, re tsoselediwe gore re bolelele le ba bangwe gore Morena o bonolo. Mopholosi wa batho botlhe o gorogile, o rata go amogelwa ke botlhe. Se se tlhomolang pelo ke fa go na le ba le bantsi ba ba thibelang, le go kaba ditsebe tsa bone, ba sa rate go amogela Morena wa barena, ba tswala dipelo tsa bone ka go emalalana le ene. Go ne go ntse jalo kwa Jerusalema, fa a ne a tsena mo motseng a palame esele. Le fa bontsi jo boglo bo mo amogetse ka boitumelo le ka tumiso e ntle, morago ga malatsi mangwe fela, bontsi jo bogolo jwa kwa Jerusalema mmogo le baperisiti ba bagolo le baeteledi pele ba bangwe ba ne ba kopa Pontio Pilato gore Jesu a bapolelwe mo sefapaanong. Le kajeno ba bantsi, le fa Jesu a tla mo go bona ka Lefoko le ka disakaramente tsa gagwe, le fa ba utlwa ka ga gagwe, ba rerelwa gore ke Mopholosi wa bone, le fa ba lalediwa ka lorato le ka tlhoafalo e kgolo, ga ba rate go mo amogela, ba a mo nyatsa, ba gopola gore ba na le tsela e e botoka e ba ka ipaakanyetsang tsa botshelo ka yona.

Wena yo o buisang thero eno, le fa wena yo o e utlwang, o se ka wa mo nyatsa, o mo amogele, o itse, o gopole gore Jesu Keresete ke Morena wa gago, ke Kgosi ya gago, o bonolo, o rata go go thusa, o go baakanyeditse botshelo jo bo sa khutleng, o rata gore o amogelwe ke Rara mo kolobetsong gore o nne

ngwana wa gagwe, o rata gore o atamele ka metlha mo boipobolong gore o itshwarelwe dibe tsa gago mo leineng la Modimo o e leng Rara, le Morwa, le Mowa o o Boitshepo, o rata gore o tshele ka go ja mmele wa gagwe, le go nwa madi a gagwe, o tlhapisiwe mo maleong a gago, o tshele jaaka ngwana wa Modimo, o mo tumise mmogo le bontsi jwa kwa Jerusalema ka go mo tlotla, le go mo kopela ka gore: AHosana go Morwa Dafita! Go bakwe yo o tlang ka leina la Morena; Hosana mo magodimodimong! @ Amen.

9. Thapelo: Morena Jesu Keresete, re a leboga, ka o itshenoletse mo go rona ka Lefoko la gago, fa o le Kgosi ya dikgosi e e tlang go rona ka Lefoko le ka disakaramente. O re thuse gore re go ikanye, re se balaele, mme re thomame mo tumelong, fa o le Morena le Mopholosi wa rona, wa batho botlhe. Re kopela botlhe ba ba iseng ba go amogele gore le bone ba gogiwe ke wena gore le bone ba go galaletse mo moletlong wa go gopola botsalo jwa gago, ba tumise leina la gago mmogo le rona le baengele. Amen.

Thapelo ya Morena: Rara wa rona yo o mo legodimong ...

10. Sefela sa 42 - 40/42

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. A. W. Weber, ka ngwaga wa 2008/ 2014.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.